

JIVI CIRCANNU PACI NAVIGANNU

Chi fazzu ccà jittatu mari mari?
Vaju spiànnu a Diu:-zoccu fazzu?
Sulu suliddu ju diventu pazzu...
si prima nun mi stancu di campari!
Supra sta varca semu quattru cani
senza patruni, canazzi di strata,
senza dumani campamu a la jurnata
e semu di la casa assa' luntani.
Ognunu di nuàtri havi na storia
e un validu motivu pi mmarcari,
e zoccu c'è chiù mègghiu di stu mari
pi rinfriscarinilla la memoria?
Ni sentu abbàsciu mmarca fattareddi,
però nun mi ni fazzu maravigghia
pirchè rispettu sti patri di famigghia
luntani di lu nidu com'aceddi.
Ju nun vinni pi la lira com'a iddi,
di ncase m'arrassài cu lestu passu
e nun pinsai no, currennu arràssu,
ca trovavu stissu celu e stissi stiddi!
E ora ca mi trovu a lu scummògghiu,
chìnu di ruppa tutti mpidugghiati,
orvu di l'occhi, è la viritati,
ju nun sacciu chiù chiddu ca vogghiu!
Ju cercu la chiavi bona pi la tuppa
di stu me cori amaru comu l'agghia

pi gràpiri pi sempì sta tinaggia
e sciogghiri accussì tutti sti ruppa!
Signuri, la me fami nun s'attuppa,
aiutami a saziari sta me panza,
pigghiami un cuppinu di spiranza
di lu to saccu e mannamillu a puppa,
mànnami l'ancileddu di la paci,
veni Tu stessu, pàscimi la suppa,
ciùscia nta 'u cori miu fattu di stuppa,
lu sai ca sta vita nun mi piaci.
Si nun mi fai lu jocu di la cucca
ti dicu lu pirchè m'alluntanai,
ti cuntù li me peni e li me guai
a modu miu senza pila mmucca.
M'ammàtula ti cuntù la me storia,
sta cruci ca ju mi portu appressu,
tantu si la voi lèggiri Tu stessu
sta scritta nta li mura d'a memoria.
Ju chianciu la so morti prematura:
appena siric'anni idda tinìa,
mi l'ammazzau la leucemìa
e nun ci potti nenti, nudda cura!
Persu l'amuri miu, persa Maria,
vacànti mi parianu li strati,
vacànti l'anni mei, li me' jornati,
lu munnu tuttu nìuru vidìa.

Adduluratu, Diu, circavi a Tia,
giravi lu paisi com'un turdu
e Ti chiamavi, ma com'eri surdu
o puru la me vuci 'un si sintìa?
Pazzu di ràggia, senza chiù risettu,
un jornu la pinsai a la caprara...
Accussì m'alluntanai di Mazara,
di la casuzza me, di lu me lettu.
Diu miu, siddu Tu nun Ti cattigghi,
siddu nun T'annoi e nun sbaragghi,
lèvami di stu cori li stuppagghi,
nzignami a scippari sti cavigghi!
L'amuri miu è morta e urvicata,
ma sidd'è veru ch'esisti l'àutra vita,
macari dacci paci a la me zita
cu n'àppi n'àppi: è fatta la picata!
Jivi circannu paci navigannu,
ma paci nun truvai 'n menzu lu mari,
ju Ti lu dicu cu sti palori amari
sunnunni sinceri, senza malizia e ngannu.
La cruci ca purtasti a lu Carvariu,
ju mi la sentu ncoddu, ncoddu a mia,
la Madunnuzza 'n chiantu mi talìa
e jietta ciuri supra stu scinariu!

LANZU

Ci semu,
arreri l'Etna trasuda,
lu focu punta
versu Zafferana
e pari na cumèta
cu la cuda
ca va sirpiannu
'n cerca di la tana.
E l'omu, spavintatu,
lu ncueta cu ruspi,
dinamiti e balatuna...
Ssu munti maistus
nun è tirannu,
lassàtilu lanzari ndisturbatu,
nun vi scantati
nun fa nuddu dannu:
Agghiùtti quarchi muru,
quarchi arvulu stuccatu
e doppu torna a dormiri cuetu...
No, nun lu vogghiu
d'accussì castiatu
ssu cori vivu
di la me Sicilia!

LA ME MUSA

Ogni pueta havi la so musa,
cu l'havi sgangulata veru laria
cu l'havi turtulidda e vaddarusa
cu l'havi svriugnata e strafalaria.

Sta musa mia, comu vosi Diu
è propriu na gran fimmina di lettu,
sugnu cuntentu e tuttu m'arricrìu
quannu s'annàca e ci taliu lu pettu.

E propriu pirchè è bedda pitturusa
còmmiru ci vaju quannu m'allatta:
chi piaciri quannu fa li fusa,
mi pari propriu mègghiu di na atta.

Quantu mi voli beni nun vi dicu:
p'idda sugnu 'u figghiu prediletto
e certu pirchè sugnu ancora nicu
la notti scuru ddà nta lu so lettu.

Sapissivu li cunsigghi ca mi duna
e si nun l'ascùtu idda si ncueta,
mi dici:-nun allattu picuruna,
lu sangu ju lu dugnu a lu pueta.

E tu ca si pueta pi daveru,
li versi toi nun mettili di latu,
mànnali 'n giru pi lu munnu nteru
ju pi chissu t'haju nutricatu.

Chidda di lu pueta è una missioni,
di li to versi tu nun si patruni
cu è ca ti duna tanta ispirazioni
quannu d"u pettu sgugghiu lu buttuni?-

Cu tutti ssi carizzi e ssi vasuna,
lu sàcciu zoccu voli la musa mia,
pi chissu grapu tutti li cascìuna
e mettu in libirtà sta puisia!

LA CATINA DI L'AMURI

Palermu stamatina
parturìu figghi a migghiara;
lu ciùmi di la spiranza
straripau acqua biniritta
lu focu di la fidi
squagghiau la cira di lu scantu
e l'umbra di la morti scumpariù.
Manu manuzzi 'n centumila
furmaru la catina di l'amuri...
Ntamenti migghiara di linzola
stinnuti a li balcuna
cantavanu a lu ventu na canzuna...
Ogni linzolu na pagina di storia
d'un libru senza auturi
chi parrava di mafia,
di sangu, di duluri...
Un libru apertu
misu davanti l'occhi di lu munnu!

LA ROSA DI LU ME JARDINU

St'annu ju ci capisciu picca e nenti,
ma cu ci curpa l'Omini o li Santi?
Un jornu pirchè ciucia lu punenti
un jornu lu sciroccu o lu livanti.
Unn'è la primavera risplinnenti
ca svigghia la natura sull'istanti?
Mi pari la staciùni di li venti
no chidda di li ciuri e di li canti!

Li mennuli, l'aranci, 'i mandarini
ntempu ri nenti persiru li ciuri
cu sti jurnati tinti e friddulini
si spampinaru e sunnu nuri e cruri...
sulu li rosi 'n menzu li jardini
p'a so biddizza e pi lu so splinduri
a postu di li stiddi murtacini
su tanti fari e mannanu caluri!

Nta 'u me jardinu rosa n'haju una
ssu ciuri havi tuttu lu me affettu
la trattu comu fussi na pirsuna
la curu, la nutrìcu, la rispettu...
e nta st'jorna volanu santiuna
staju pirdennu propriu lu risettu
mi scantu ca lu ventu si n'adduna
e mi la fa siccari... pi dispettu!

LA TERRA MIA

Taliàti la Sicilia,
vi la presentu 'n chiantu:
chìssa è me matri,
è la terra mia!
Lu distinu la vosi serva;
a dinucchiuni, scausa,
strazzata e vilipisa.
Da sempì scapisata,
da sempì suttamisa
a lu tirannu!
Chìssa è me matri
e vi la raccumannu:
purtaticci rispettu,
trattatila cu amuri
pirchì è stata sempì
lu specchiu di l'onuri!

LU BATTIZZARU "ALBERO FALCONE"

C'è 'n-arvulu a Palermu
addubbatu di ciuri
da manuzzi 'nnuccenti...
Pari ca nun produci nenti,
ma palpita d'amuri!
E ogni palermitanu
ca passa di ssa strata
jisa la manu
cogghi na fogghia sdisiccata
la strinci nta lu pettu
e cu 'n-suspiru mutu
grida a lu celu
tutta la so raggia!

LITTRA A MARIA

Maria,
amuri,
ciùri di la vita mia!
Comu 'n-apuzza
ti vulavu ntornu,
jornu pi jornu,
sempi chiù 'nnamuratu.

Ricordi?

La nostra primavera
veru picca durau.
Ddu jornu disgraziatu
quannu vinisti menu
si jinchìu di vilenu
la me vita.

Maria, àvi di tannu
ca stu cori nun ridi.
Amuri, àvi di tannu
ca nun chianciu chiù
pirchè li me' lacrimi
fineru ddu jornu stissu.

Ma ogni tantu ritornu
a pinzari a ddu jornu
quannu li me' pinzeri
comu foggghi sicchi
vularu nta dda stanza...

Fogghi senza spiranza
ascippati a lu me cori!
Amuri, ora staju campannu
lu tempu chi tannu
era lu nostru futuru.
Però lu campu sulu,
comu 'n-arvulu nuru
chi sta aspittannu
nàutra primavera.
Maria, ancora aspettu
e dintra stu pettu
è ancora 'nvernu!

LI VICCHIAREDDI DI LU ME QUARTERI

Comu vigni caricati di pàssula
ca nuddu chiù vinnigna,
stannu assittati all'ùmmira
strincennu lu vastuni
cu ddi manu ca pàrinu
agghiomari di vini nùuri e vunci
comu si vulissiru scuppiari...
Sunnun li vicchiareddi di lu me quarteri
ca mentri jocanu a briscula
si cuntanu ntra d'iddi 'n alligria
mprisi di guerra 'n Africa,
storii di prigiunà...
Comu robbi passati di moda
ca nuddu chiù mètti,
stannu ncugnati l'unu all'àutru
facennusi ogni tantu na pipata...
Sunnun li vicchiareddi di lu me quarteri
ca, comu picciriddi-granni,
curvi sutta lu pisu di l'anni,
parranu di cosi ca nun ci su' chiù:
Oh, beddi tempi di li so' vint'anni
quann'eranu preghi l'onuri e la virtù!
Magari s'abbuscava picca e nenti,
ma si campava cu tranquillità
senza droga, nè pizzu nè tangenti,
cruci e dilizia di sta società...

E parrannu parrannu di ssi cosi
ntempu ri nenti la jurnata passa,
si scordanu la sciatica, l'attrosi,
la luci, lu telefonu... la tassa;
ca specii nta sti jorna va pagata...
Mannò n'arriva nàutra stangata!

LU NOSTRU DISTINU

Chìssu è lu nostru distinu:
travagghiari comu armali,
strinciri li renti suspirannu
e agghiùttiri spissu vuccun'amari!
Curriri ntussicati
appressu a l'ùmmiri,
sempi assicutati di lu tempu,
e spenniri na vita a picca a picca
pi mparari a campari...
e all'urtimu mumentu,
quannu n'attruvamu
cu 'n-pugnu di muschi 'n manu
ammàtula chiancemu dispirati:
sempi troppu tardi n'addunamu
c'un avemu chiù mancu lu tempu
pi mparari a mòriri!
E ni purtamu appressu
ddu gridu repressu
ca 'un pottimu jittari,
dda cosa ca 'un ficimu
e putìamu fari... ni ni jiemu
quasi a l'ammucciuni
lassannu nta 'n-muru di crita,
quasi a pinnuluni,
lu quatru di la nostra vita

cu na firma e na data
mala scarabocchiata.
Propriu d'accussì ni ni jiemu,
spissu a la mpinsata,
ntra un viri e sviri,
cu ddu pisu ravusu ntra lu cori
ca ognunu si porta quannu mori!